



Број/Број: 03-/4-50-1-10-27-15/9  
Сарајево/Сарајево: 15. 9. 2009. године

## **Z A P I S N I K**

### **27. sjednice Zajedničke komisije za evropske integracije Parlamentarne skupštine BiH**

Sjednica je održana 15. 9. 2009. godine sa početkom u 14 sati.

Sjednici su prisustvovali članovi Komisije: Halid Genjac, predsjedavajući, Ivo Miro Jović, prvi zamjenik predsjedavajućeg, Drago Ljubičić, drugi zamjenik predsjedavajućeg, Alma Čolo, Šemsudin Mehmedović, Hilmo Neimrlija, Branko Dokić, Zoran Koprivica i Selim Bešlagić.

Milica Marković, Božo Ljubić i Azra Hadžiahmetović nisu prisustvovali sjednici, opravdali su odsustvo.

Jerko Ivanković Lijanović, kao predlagač Zaključka koji je razmatran, prisustvovao je sjednici, a u ime Vijeća ministara BiH sjednici je prisustvovao Samir Rizvo, predsjedavajući Interresorne radne grupe za liberalizaciju viznog režima EU za građane BiH. Sjednici su prisustvovali i predstavnici OSCE - Misija u BiH, kao i predstavnici medija.

Prisustvovala su, takođe, Vlatka Dangubić, sekretar Komisije i Vladana Lučić, stručni saradnik u Komisiji.

Komisija je jednoglasno usvojila sljedeći

## DNEVNI RED

1. Usvajanje Zapisnika 26. sjednice Komisije;
2. Davanje mišljenja o o Prijedlogu zaključka poslanika Jerka Ivankovića Lijanovića podnesenom na 13. zajedničkoj sjednici oba doma Parlamentarne skupštine BiH, održanoj 24.7.2009.
3. Davanje mišljenja o Izvještaju o izvršavanju Plana aktivnosti za ispunjavanje preostalih obaveza iz Mape puta za liberalizaciju viznog režima za period od 15. 7. 2009. do 7. 9. 2009.
4. Tekuća pitanja.

### **Ad. 1. Usvajanje Zapisnika 26. sjednice Komisije**

Zapisnik 26. sjednice Komisije usvojen je jednoglasno.

### **Ad. 2. Davanje mišljenja o Prijedlogu zaključka poslanika Jerka Ivankovića Lijanovića podnesenom na 13. zajedničkoj sjednici oba doma Parlamentarne skupštine BiH, održanoj 24.7.2009.**

Nakon uvodnog izlaganja Halida Genjca i izlaganja poslanika Jerka Ivankovića Lijanovića o razlozima podnošenja predmetnog prijedloga zaključka provedena je rasprava u kojoj su učestvovali svi prisutni članovi Komisije; većinom glasova, osam "za", i jednim "suzdržanim" (Zoran Koprivica) usvojeno je sljedeće:

## MIŠLJENJE

### **o Prijedlogu zaključka poslanika Jerka Ivankovića Lijanovića podnesenom na 13. zajedničkoj sjednici oba doma Parlamentarne skupštine BiH, održanoj 24.7.2009.**

Parlamentarna skupština BiH je na nastavku 13. zajedničke sjednice, održane 24. 7. 2009., u okviru 2. tačke dnevnog reda razmatrala *Polugodišnji pregled realizacije aktivnosti iz Akcionog plana realizacije prioriteta iz dokumenta Evropsko partnerstvo s BiH za period 1. 1. 2009. – 30. 6. 2009. i Izvještaj o stanju provođenja Privremenog sporazuma i SSP-a, za period 1. 1. 2009. – 30. 6. 2009.* Napominjemo da je Zajednička komisija za evropske integracije dostavila domovima Mišljenje o navedenim materijalima 23.7.2009.

Povodom rasprave o navedenim materijalima, poslanik Jerko Ivanković Lijanović podnio je Prijedlog zaključka o kojem se domovi nisu izjašnjavali.

Nakon rasprave o navedenoj tački dnevnog reda zaključeno je da će se, nakon što Zajednička komisija za evropske integracije Parlamentarnoj skupštini BiH dostavi svoje mišljenje o navedenom prijedlogu zaključka, oba doma Parlamentarne skupštine BiH na odvojenim sjednicama izjašnjavati o materijalima iz navedene tačke dnevnog reda, zajedno s mišljenjem Zajedničke komisije za evropske integracije.

Zajednička komisija za evropske integracije razmatrala je predmetni Prijedlog zaključka i, nakon rasprave u kojoj je više članova iskazalo veliko nezadovoljstvo radom institucija koje su nadležne za stvaranje uslova za izvoz bosanskohercegovačke robe na evropsko tržište, kao što su: Ured za veterinarstvo BiH, Agencija za sigurnost hrane BiH i Uprava Bosne i Hercegovine za zaštitu zdravlja bilja, konstatirala potrebu da se ove institucije angažiraju u punom kapacitetu u realizaciji svojih obaveza, i uz primjedbu da u stavu c) Prijedloga zaključka, umjesto riječi: „iskoristi mogućnost Sporazuma“ stoji: „u skladu sa Sporazumom“ i iza riječi: „te prema njemu hitno“ brišu riječi: „a najkasnije u roku 30 dana“, sa čim se složio poslanik Ivanković Lijanović, koji je prisustvovao sjednici, sa osam glasova "za", bez glasova "protiv" i jednim "suzdržanim", utvrdila da se

### **Podržava prijedlog poslanika Jerka Ivankovića Lijanovića.**

Za izvjestioca na sjednici Predstavničkog doma imenovan je Halid Genjac.  
Za izvjestioca na sjednici Doma naroda imenovan je Ivo Miro Jović.

### **Ad. 3. Davanje mišljenja o Izvještaju o izvršavanju Plana aktivnosti za ispunjavanje preostalih obaveza iz Mape puta za liberalizaciju viznog režima za period od 15. 7. 2009. do 7. 9. 2009.**

Nakon uvodnog izlaganja Halida Genjca i provedene rasprave u kojoj su učestvovali svi prisutni članovi Komisije, usvojeno je sljedeće:

## **MIŠLJENJE**

### **o Izvještaju o izvršavanju Plana aktivnosti za ispunjavanje preostalih obaveza iz Mape puta za liberalizaciju viznog režima za period od 15. 7. 2009. do 7. 9. 2009.**

Vijeće ministara BiH je na 98 sjednici, održanoj 14. 9. 2009., usvojilo Izvještaj o izvršenju Plana aktivnosti za ispunjavanje preostalih obaveza iz Mape puta za liberalizaciju viznog režima za period 15. 7. 2009. do 7. 9. 2009., i zadužilo Interresornu radnu grupu za pregovore s Evropskom komisijom o liberalizaciji viznog režima da ga dostavi PSBiH, što je i učinjeno.

Kolegij Predstavničkog doma je dopisom, broj 01/a-50-1-15-60/09, od 15. 9. 2009., od Zajedničke komisije za evropske integracije zatražio mišljenje o Izvještaju o izvršavanju Plana aktivnosti za ispunjavanje preostalih obaveza iz Mape puta za liberalizaciju viznog režima za period od 15. 7. 2009. do 7. 9. 2009.

Zajednička komisija za evropske integracije razmatrala je predmetni materijal i, jednoglasno, usvojila sljedeće mišljenje:

U Izvještaju se navodi da je od ukupno 52 zahtjeva u potpunosti ispunjeno 10, ispunjavanje 38 zahtjeva teče u skladu s planom i kod 4 zahtjeva postoji ozbiljan zastoj u ispunjavanju.

**I.** Zahtjevi koji su ispunjeni u potpunosti uglavnom se odnose na pitanja imigracija (izgradnja prihvatnog centra, monitoring migracionih tokova, dodatne prostorije u prihvatnom centru, jačanje interagencijske saradnje u borbi protiv ilegalnih migracija) i na pitanja zaštite ličnih podataka (pravila o zaštiti ličnih podataka i operativno uspostavljanje Agencije za zaštitu ličnih podataka). U ovoj grupi „potpuno ispunjenih zahtjeva“ neosnovano su navedeni i zahtjevi koji nisu u potpunosti provedeni (npr. Zahtjev „pravne i administrativne mjere na provođenju međunarodnih standarda uključujući preostale GRECO preporuke“).

Dakle, u potpunosti je ispunjen veoma mali broj i to najjednostavnijih zahtjeva.

**II.** Za 38 zahtjeva u Izvještaju se navodi jedinstvena ocjena: „Aktivnosti na ispunjavanju zahtjeva teku u skladu s planom. Nisu uočeni problemi koji bi onemogućili ili usporili ispunjavanje zahtjeva“.

Za svaki od tih 38 zahtjeva navedene su aktivnosti koje treba da budu realizirane do označenog roka, najčešće je to do 15. 9. 2009. ili ranije. Uglavnom se radi o velikom broju aktivnosti za svaki od 38 zahtjeva. Iz Izvještaja je nejasno da li su u predviđenom roku te aktivnosti provedene ili nisu, jer je rubrika „dinamika realizacije“ za svaku od tih aktivnosti prazna. Stoga je Izvještaj nekompletan i neažuran.

Osim toga, ocjena „Aktivnosti na ispunjavanju zahtjeva teku u skladu s planom...“ je neargumentirana u više slučajeva (npr. za zahtjev „Usvajanje zakona o centralnom antikorupcionom tijelu“ rok je bio da se do 15. 9. 2009. Prijedlog zakona dostavi u parlamentarnu proceduru. Zakon još nije dostavljen u parlamentarnu proceduru, a u Izvještaju stoji ocjena da nema kašnjenja.

**III.** Za 4 zahtjeva za koje je navedeno da „postoje ozbiljni zastoji u ispunjavanju“, osim opće konstatacije da „postoji ozbiljan zastoj“, nisu navedeni razlozi zastoja. Neophodan je aktivniji angažman Vijeća ministara BiH i drugih relevantnih institucija radi što hitnijeg provođenja tih zahtjeva.

Napominjemo da treba imati u vidu da se Izvještaj odnosi na period do 7. 9. 2009., a da je razmatran na sjednici Komisije 15. 9. 2009., što utiče na ažurnost, jer se obaveze svakodnevno ispunjavaju.

Komisija sugerira da svi podneseni zakoni, koji su evidentirani kao dio obaveza iz Mape puta za liberalizaciju viznog režima za građane Bosne i Hercegovine, u Parlamentarnoj skupštini BiH budu tretirani u skraćenoj proceduri.

Za izvjestioca na sjednici Predstavničkog doma imenovan je Halid Genjac.  
Za izvjestioca na sjednici Doma naroda imenovan je Ivo Miro Jović.

Sjednica je završena u 18,00 sati.

Predsjedavajući  
Zajedničke komisije  
Halid Genjac

